

कोई इकली जैयो मत गोरी ।।

जो तू जावैगी पनघट पै, ठाड़ो पावैगी पनघट पै

गगरी फुरवैयो मत गोरी ।

जो तू जावैगी दंधी बेचन, आगे पावैगी नंदनंदन

माखन लुटवैयो मत गोरी ।

जो तू जावैगी जमुना पै, मोहन पावैगी जमुना पै

फरिया चुरवैयो मत गोरी ।

जो तू जावैगी वन कुंजन, बैठ्यो पावैगी मनमोहन

वा ते बतरैयो मत गोरी ।।

-----O-----

मेरे पीछे ते मारे हेला, ये बंद जू को ढोटा अलबेला ।।

घाट बाट ओ गली गिलारे, डोलै बन के छैला ।।

लै लै मेरो नाम बुलावै, जो कहूँ मिलै अकेला ।।

पीताम्बर को झालौ देवै, देख कुंज की गैला ।।

एक दिन मिल्यो न्हात यमुना पै, दै पानी को रेला ।।

सास ननद के बीच हों बैठी, अचक मार गयो डेला ।।

-----O-----

श्याम लैयजों की मारे कटार, पनघट नांय जाऊं ।।

आगे चलूं तो आगे आवै

पीछे मुड़ू तो संग मुड़ जावै

ऐसी इकली फंसी बिच धार, पनघट... ।

बैठ जाऊं तो बैठे संग-संग

छूवन लागे सबरो अंग-अंग

वो तो विनती करै बार-बार, पनघट... ।

मैं ही ऐसी कहा अनोखी

मैं ही लागों वाको चोखी

भंवर सो करै गुंजार, पनघट नांय जाऊं ।।

-----O-----

हंडुरी मेरी ले जायो साँवरिया ।।

पनघट पै वह आयो रसिया, मैं भर रही री गगरिया ।

गगरी भरके चली मैं उचवै, पकरयो कर लंगरैया ।

झटक छुड़ाय कलैया अपनी, ओढ़न लगी मैं चुनरिया ।

हंडुरी लै गयो नंद महर को, देखत मैं रही जगरिया ।

हंडुरी संग मेरो मनहू लै गयो, कर गयो मोकूँ बावरिया ।

जाने कैसे जादू कर गई, वाकी बांस की बंसुरिया ।।



कन्हैया मेरी गहरी उचाय ।।

इकली ठाड़ी भरकें गगरी, कोई न उचवाय।  
ऐयो रे मेरे नंद के खिलारी, दीजो हाथ लगाय।  
जिठानी मेरी बैरिन भई, देवुरानी सोर मचाय।  
मैं इकली कहा कहूं रे रसिया, तू ही गैल बताय।  
जब जब तेरी बंशी बाजै, मोकूं नींद न आय।  
पलका पै करवट बदलत ही, सिगरी रात बताय।  
जब-जब तू गैयन को टेरै, ऊंची बांह कराय।  
देख देख तेरी मधुरी छवि, मेरो मन बिक जाय।।

-----O-----

नंद जू को छैया अलबेगौ,

मेरी मटकी में मार गयो डेगो ।।

गगरी भरी चली मैं उच के, आयो कहूँते छैलो, मेरी।  
चूनर सारी सबरी भीजी, पानी सबरो कैलो, मेरी।  
चूनर मेरी लगयो निचोरन, कारो मन को मैलो, मेरी।  
कबहु पनघट औ यमुना तट, वंशी बजावै अकेलो, मेरी।  
कबहुं धरे खोर सांकरी, लै ग्वालन को मैलो, मेरी।

ले गयो चीर मुरारी, कन्हैया लाल बनवारी ।।

हम जल माहिं उधारी, कन्हैया..।  
चीर हमारी देओ लालन  
हमको लाज लगै भारी, कन्हैया..।  
जल ते है जाओ न्यारी, कन्हैया..।  
जल ते न्यारी कैसे होवैं  
लोग हंसैं दै तारी, कन्हैया..।  
लोग हंसैं तो हंसवैं देओ  
हम हैं पुरुष तुम नारी, कन्हैया..।  
जल के पार बांध बांह आई  
चीर दियो गिरधारी, कन्हैया..।  
बोले श्याम सुनो ब्रज बाला  
पूजा सफल तुम्हारी, कन्हैया..।  
ब्रत कर देवी पूजी तुमनें  
सिद्ध भई सब प्यारी, कन्हैया..।  
तुम संग रास करूं वृन्दावन  
यमुना तट सुखकारी, कन्हैया..।।



कांहा काहे को हमारी तैबें फोरी गगरी।  
 प्यारी काहे को हमारी तैबें छीबी बंसरी।  
 मैं तो यमुना नीर भरन गई पायो कुँवर कन्हार  
 इकली मोते बीच बनी में नाहक रार मचाइ  
 गगरी फोरी तैनैं दीनी पीछे कंकरी।  
 बंसी बिन मैं चैन न पाऊं बंसी देओ हमारी  
 जो नहि बंसी देओ भासिनी का गति करुं तिहारी  
 ये बंसी प्राणन ते प्यारी देखो हमरी।  
 गवाल बाल नित ही लैकें क्योँ रोकैं गैल हमारी  
 नित प्रति रार मचावै मोते नटखट कृष्ण मुरारी  
 ठाड़ो पनघट रार मचावै रोकैं मेरी डगरी।  
 काहे रार बढ़ावै मोते ओ गोरी ब्रजनारी  
 तै गई बंसी देओ मेरी ओ बरसाने चारी  
 न्याय करैगी भानु कुँवरि दाता जो भोसी-भारी॥

-----O-----

देख्यो री आज बांका सांवरिया॥

मैं यमुना जी न्हाय रही थी,  
 आयो री वो तो यमुना किनरिया।  
 कमल सो मुख ओ चंदा सी चितवन,  
 री अँखियां जैसे कमल पंखुरियां।  
 अधरन मधुरी बंसी बाजी,  
 भूल गई मैंतो भरन गगरिया।  
 न्हावन धोवन भूल गई मैं,  
 धुन सुन रुक गई यमुना लहरिया।  
 लहंगा ओढ़ पहर लई चूनर,  
 ऐसी बाजी वो बैरिन बंसुरिया।  
 जैसी बंसी तैसो बजैया,  
 बिक गई मैं बिन मोल गुजरिया॥

-----O-----

यमुना पै श्याम बुलाय गयो री॥

सास ननद जितनी बिच बैठी,  
 पीताम्बर छोर हिलाय गयो री।



कदम ओट हवै मन कौ रसिया,  
झालो मोहि दिखाय गयो सी।  
दूर जाय के वन कुंजन में,  
बंशी-मधुर बजाय गयो सी।  
बंशी में तै नाम हमारो,  
गीत रसीले गाय गयो सी॥

-----O-----

पनघट पै आयो नंद लाल,  
सखी लटक रही बैजंती माल॥

वो आवत गगरी भरन लगयो  
भर-भर के मोय उचावन लगयो  
झट धुंधट खोल मेरो छुवत गाल, सखी...।  
मुख मोर चली मेरे संग चल्यो  
मैंतो कमल कली वोतो भंवर बन्यो

पीछे ते गावै रस के ख्याल, सखी..।

यह नंद महर को है रसिया  
कैसी मीठी बजावै है बंसिया  
जादू चटक के करै है जाल, सखी..॥

आई आई नंद के रे जुलमी, मत जा मत जा रे बेदरदी॥

ऐसी तैनं मारी कांकरिया  
फूटी जो मेरी गगरिया  
भीजी-भीजी नंद के रे जुलमी रे मत जा..।

भीजी हीरा जड़ी मेरी अंगिया  
बिगरी मेरी सारी औ चुनरिया

भाजै भाजै काहे अरे जुलमी मत जा..।

पहले पहल मैं आई बहुरिया

कैसे जाऊं सब हंसै गामरिया

कैसी करी तैनं नंद के रे जुलमी मत जा..।

आज तैनं बहुत अनीती करी

ऐसी देखी न सुनी कहूं अचगरी

उरै नैंक न नंद के रे जुलमी रे मत जा..॥

-----O-----

उमड़ रह्यो उमड़ रह्यो,

दरसन को मेरो मन उमड़ रह्यो॥

निरमल नीर बहै यमुना को,

नहावन को मेरो मन उमड़ रह्यो।



यमुना तीर रहै एक ढोटा,  
देखन को मेरो मन उमड़ रह्यो।  
सुन्दर स्याम सरीर सलोना,  
परसन कों मेरो मन उमड़ रह्यो।  
मधुरे मधुरे बंशी बजावै,  
सुनवे को मेरो मन उमड़ रह्यो॥

-----O-----

ए कान्हा छांडो ल मेरी बैया॥

पायल बाजै छन नननननन  
बिछुवा बोलैं झन नननननन  
चुरियां खनकैं खन नननननन

ए कान्हा सुन लेंगी ब्रज की लुरैया॥

अटकै मत फूटैगी गगरी  
सूनी नांय यमुना की जगरी  
चतुरन की यह गोकुल नगरी

ए कान्हा मान परूं तेरे पैयां॥

-----O-----

## चोर शिखामणि

येसो ढीठ भयौ नंदलाल, ब्रज में धूम मचायो है॥

मैया री या ब्रज को बसिवौ  
हाय कटिन है ह्यां को रहिबौ  
नये-नये उधम कौ सहिबौ

सास नन्द ते होय फजीतो, नित कौ दायो है।

गवाल बाल लै घर में आवै  
बछरा खोल कहूँ छिप जावै  
बछरा कूदें वह भज जावै

वन-वन बछरा ढूँढ़न जावैं, गैल भुलायो है।

पलका पै में सोय रही दिन  
अचक अचक आयो ताही छिन

पाटी ते बांध्यो चोटी तिन

चोटी खोलत माखन सबरौ, झट गटकायो है।

पिछवारें ते हेला मारे

गई देखवे धूँघट धारे

तौ लौं जुलम कियो वह भारे

घर में दूध दही मिसरी कौ कियो सफायो है॥



भैया भरे बैर परी हैं ब्रज की गोपी फिरिया फार।

लालाजी कह मोय बुलावैं  
घर में पट्टा पै बैठावैं  
हंस हंस सैनन ते बतरावैं  
मैया बेटा हम दोउ भारे भारेन को न गुजार।

विनती कर माखनै खगावैं  
वंशी सुन के नांच नचावैं  
जान न देवै आँख दिखावैं  
जब मैं चलूं लगावैं चोरी, नाहक तानैं रार।

पनघट पै ये झालो देवैं  
ना जाऊँ तो ऊधम देवैं  
नये ढोंग नित ही रच लेवैं  
फोरें खुद मटकी पै मेरो नाम लगावैं नार।

इक दिन खोर सांकरी पाई  
बोली मैं करवाऊँ सगाई  
कारे की को करै सगाई  
मैंने कही यहाँ पै तेरी नाय गरैगी दार।

आपै दूध दही लुढ़कावैं  
मेरे सिर पै दोष लगावैं  
सैन चलावैं लिपटत आवैं

झूठे चोर बतावैं मोते ऐसी खावैं खार।

आपै घूँघट खोल दिखावैं  
खोल्यो घूँघट श्याम बतावैं  
पानी में ये आग लगावैं

देन उराहनो छिन-छिन आवैं, मैंने मानी हार।।

-----O-----

सगाई तेरी फिर जायेगी, चोरी छोड़ कन्हाई।।

सुनलै प्यारे नंद लाड़ले, चतुर छैल हरजाई,  
सुन-सुन के चोरी की बतियां, फिर गये बाहून नाई,  
बात ये बिगर जायेगी, चोरी छोड़ कन्हाई।  
दूध दही माखन बहुतेरो, दैया और मलाई,  
काहे मांगे दान दही कौ, गैल गिलारे जाई,  
समझ कब पर जायेगी, चोरी छोड़ कन्हाई।  
तेरे कारन नंदराय की, घर-घर होय हंसाई,  
बरसाने की राजकुंवरी सों, तोरी बात चलाई,  
बुराई तेरी है जायेगी, चोरी छोड़ कन्हाई।।

-----O-----

नारायण चोरन गये श्याम, घर काऊ चतुर मुबारी के।

पहले झांक रहे बाहर ते  
आहट तेन लगे चुपके ते



भीतर बैठी छिप चोरी ते

जान न सकै श्याम घुस बैठे, लालच माखन के।

छींके पै ही धरी कमोरी

चल्यो खाट चढ़ करवे चोरी

देख रही छिप के वह गोरी

लई उतार कमोरी, माखन खायो मन भर के।

झपट पकर लई नन्द कौ लाला

संग लै चली धींगरी बाला

माखन लग्यो हाथ औ गाला

आगे बाला पीछे लाला, चलीं महल मां के।

घूंघट मार चलीं ब्रजनारी

पति कौ रूप धर्यो बनवारी

जाय कही जसुदा महतारी

हम लाई हरि चोर मात, आ बाहर महलन ते।

देखत हंसी यशोदा मैया

बोली यह नहीं कुँवर कन्हैया

ये तो तेरी सजन लुगैया

भई सरम ते पानी, देखत मुख घरवारे के॥

चोरी की सब झूठी बात मात तैबें सांची जाब लई।

झूठी ये सब ब्रज की बाला

झूठे झूठ बजावैं गाला

झूठे आय लगावैं जाला

झूठै नाम लगाय सबन नें बहुतै ऐब दर्ई।

तेरी मैं छोटो सौ लाला

भोरे मेरे ब्रज के गाला

जहाँ तहाँ ये करैं बुराई इननैं बैर ठई।

बाहर मोते हौले बोलैं

मीठे-मीठे रस कुं छोलैं

हैंस-हैंस मनुआ चोरैं मेरी बेनु चुराय गई।

एक दिना की सुन लै मैया

ये तो बांधन लागी गैया

बन्दर एक धंस्यो धमधैया

माखन दूध दही सब खायाँ मोपे कुपित भई।

मुख्यावै सुन जसुदा रानी

तेरी बात नांय है छानी

भयो लाडिलो तू मनमानी  
पर घर में जायवे तैं लाला सीखे बात नई॥



## बन्दर लीला

धनि धनि ब्रज मण्डल के बन्दर  
हरि संग चोरी करवे जांय ॥

पहलै भवनन पर चढ़ जावैं  
उछर कूद कै धूम मचावैं  
खिर-खिर खौं-खौं सबन जरावैं  
तै डंडा जब चढ़ी गोपिका छत से सब भग जांय।

तब तक हरि नीचे भवनन में  
लगे अचक भांड खखोरन में  
माखन दूध दही चोरन में  
मिसरी बूरा लड्डवा गुंजा ग्वाल सबै समगांय।

छत पर चार पांव के बानर  
घर भीतर है पांये बानर  
नीचे ग्वाला ऊपर बानर  
भई फजीती बहुत चोर सब भागे, पकर न जांय।

बाहर दूर सबै मिलि आये  
बांट-बांट के भोग लगाये  
हरि ने बानर खूब झिकाये  
हरि के कर कमलन सों तै तै बानर माखन खांय।

रामादल के ये हैं बानर  
लंका जीत्यो प्रबल युद्ध कर  
मारे पापी दुष्ट निशाचर  
बेता करी सहाय यहाँ दधि चोरी भये सहाय।

-----O-----

गलिया बड़ी बन्द कौ छैयाये तो चोरन कौ सरताल।

दादा गुरु चोर मण्डल कौ  
बहु छल जानैं दधि चोरन कौ  
खावै फोरै दधि भाजन कौ  
गाल बाल चेला चंटारी श्याम गुरु महाराज।

सखा एक बन सखी नवेली  
मेरी देवरानी सों बोली  
भेज जितानी अपनी भोली  
बाके पीहर ते में आई मिलवै को इक काज।

में सुन गई दौर मिलवै को  
पहुँची दूढ़ न पाई वाको  
दूढ़न लगी बहुत में ताको  
लौटी घर को तब समझी यह धोखे कौ सब साज।



दूरइ ते देखे सब गवाला  
 निकसे घर ते हंस दै ताला  
 गूठा मार रह्यो नन्दलाला  
 पछतार्ई में बहुत गिरी मोपै कैसी यह गाजा  
 दूर खड़ी चोरन की टोली  
 हँस-हँस मोतें करैं ठिठोली  
 बोलैं मोते तू है भोली  
 सूने घर ते हमने टारे बन्दर खा रहे नाजा  
 घर कूँ छोड़ कबहु ना जैयो  
 चोरी कौ मत नाम लगेयो  
 हमनें करी भलाई सुनियो  
 तेरे घर ते कुत्ता बिल्ली बन्दर टारे आज  
 घर में घुसी बहुत पछतार्ई  
 दूध दही की करी सफाई  
 सद लौनी सबरी गटकाई  
 खायो जो कछु हाथ परयो फैलायो जल बेकाला

-----O-----

## मान लीला

मन्दिर शिखर मानगढ़ ऊपर राधा मानविहारी लाल।

पर्वत ब्रह्माचल बरसाने  
 राधा माधव रस सरसाने  
 बिहरैं प्रेम भरे मन माने  
 गहवरवन के पश्चिम न्यारी चोटी चमकै भाल।  
 बैठी सुन्दर कीरति बाला  
 नटखट चंचल नंद के लाला  
 कछु लंगरार्ई करी गोपाला  
 गोरी भरी गुमान रूप की मान कियो तत्काल।  
 बिनती बचन सुनै नहिं प्यारी  
 दर्पन दिखरावैं गिरिधारी  
 नहिं देखैं अधरन फरकारी  
 प्रियाचरण निज मोरमुकुट ते सहरावैं गोपाल।  
 सखी सहचरी मेल करावैं  
 हरि नैनन आँसू ढरकावैं  
 कबहु गावैं नृत्य दिखावैं  
 नाना भांति रिझावैं तब कहुं सीझै गोरी बाल॥



चढ़ पर्वत ऊपर बैठी, खेलेत में प्यारी खूटी।।  
 गहवरवन में रास रच्यो, ता थेई तत थेई बोले है,  
 नाचत अगनित फिरकैया लै, तब सम को दिखरावै है,  
 ताल अनेक ताल माला में, नाचत घूम बनैठी।  
 उरप तिरप गति आइ कुआड़हि लै दिखाय संग नांचे हैं,  
 अद्भुत लारय देखि प्यारी कौ वाहवाह पिय भाखे है,  
 एक बोल पै टोक्यो लालन तान्यो मान अनूठी।  
 चढ़ी मानगढ़ ऊपर मान कियो राधा ठकुरानी हैं,  
 सब ठाकुर कौ ठाकुर रासबिहारी की महारानी हैं,  
 हाथ जोड़ पिय आगे ठाढ़े तबहु तिय नहि तूठी।  
 जब जब प्यारी आगे आवै, पीठ देय मुख फेर्यो है,  
 मुकुट छुआवत चरनन में तब हाथ पकर कै टार्यो है,  
 सब सिंगार उतार धरे फेंकी पिय दर्द अंगूठी।  
 पीताम्बर की छांह करै, तब हटै उठै जब प्यारै है,  
 नयन न देखत देखत कोरन छु नहिं जाय बचावै है,  
 सुनै न दीन वचन कानन में देत आंगुरी झूटी।  
 सखी मानगढ़ वारी की पिय किय अधीनता गिरिधारी,  
 वाके जतन प्रिया तब सीझीं निरखीं प्यारे बनवारी,  
 पिय याचत मुख बीरी प्यारी दीनी करके जूटी।।

मन्दिर मान मानगढ़ ऊपर गहवरवन बरसाबे में।।

इकली ऊँची शिखर निराली  
 चारों ओर झुकी हरियाली  
 बिहरैं नित्य प्रिया वनमाली  
 प्रीति रंगीली खेल रंगीले नित गहवर वन में।  
 सकल कला की मूल स्वाभिनी  
 गायी एक दिन नई रागिनी  
 करैं अचम्भौ सकल कामिनी  
 सीखन लगे श्याम प्यारी सों अति उत्कंठा में।  
 स्वर विस्तार प्रिया समझावैं  
 राग वक्र गति गाय बतावैं  
 मोहित पिय पूछत ही जावैं  
 प्यारी कोयल के कोमल सुर सुनवे लालच में।  
 रूठी भाभिनी भानुदुलारी  
 बोलें ते नहिं बोलीं प्यारी  
 देखे नहिं देखे सुकुमारी  
 कोमल चरन छुवन नहिं देवें सदृढ़ मान मन में।



बोले पिय सुन बिनती प्यारी  
तुम उदार गुरु बनी हमारी  
सीखी रागिनी कृपा तिहारी  
तुम्हरे मीठे स्वर सुनवे को फिर-फिर पूछ्यो छल में।  
वही राग हरि गाय सुनायो  
सुन वह राग मान बिसरायो  
रीझी प्यारी कंठ लगायो  
प्रणय मान जाने ना नीरस कलह मान सब जग में।

-----O-----

### ब्याहुलौ

वृषभाबुलबिंदनी सजनी बनी, प्यारी सजनी बनी।  
कुंज महल में ब्याह रचायो, सखियन के मन ऐसी ठनी।  
श्री राधा को करौ दुलहिनी, दूलह याकौ श्याम धनी।  
हरद चढ़ाय बंधाय सेहरा गीत गवावैं सकल जनी।  
कछु तो सखियाँ बनी घराती, सजी बराती बनी ठनी।  
चढ़ी बरात बजे बाजे सब दूलह की घुड़चढ़ी मनी।  
पाणिग्रहण कराय लली कौ ताल भये राधारमनी।

सखी पुरोहित मंत्र उचारैं, पढ़ी भाँवरी सात गनी।  
कंकण छोरन चले लालजी, पकरन पावैं छोर तनी।  
प्रेम चढ़यो तन काँपन लाग्यो, हैंसी सहचरी ताल धुनी।  
दूध पियौ यशुदा कौ तौहू, भई निबलता कुल लजनी।  
गोरे मात-पिता तुम कारे, बात तिहारी लाज घनी।  
तन के कारे मन के कारे, ब्याही कैसे शशिबदनी।  
लली चरन पादुका लाय के, पुजवावे सब मृदु वचनी।  
जानमान कें पूज रहे हरि, भाग-मान मन्मथमथनी।  
गाँठ जोर के दर्द देवता, पूज रही जोरी कमनी।  
अपने मन की आशा मांगो, बोली सखी सुभग सदनी।  
वरनी ने मांगयो बरना की, बनै बान लजनी समनी।  
हरि बोले वृन्दावन देवा, कबहुँ न रूठे मनबसनी।  
गाय रहीं सब गीत ब्याह के, गारी मीठी मधुहंसनी।  
नांच रहीं भई घोर कौंधनी, पायल और बिछुवा बजनी।  
बज रहे ब्याह बंधाये कुञ्जन, जोरी कंचन हीरकनी।।

-----O-----



भानु की पोरी झाँके श्याम,  
आयके लुक-छिप चोरी ते ॥

नजर बचाय सबन की मोहन  
लागें श्री राधा के गोहन  
छद्म अनेक धरे मुख जोहन  
महलन ड्योड़ी उझके, आँख मिलावें गोरी ते ॥

श्री वृषभानुराय की बेटी  
मोहन लाल लाय उर भेटी  
गाढ़ी प्रीति कान सब मेटी  
लिपटी ज्यों दामिनि बादर ते, भुज भर कौरी ते ॥

वट संकेत मिले वे कबहुँ  
प्रेम सरोवर खेतें कबहुँ  
श्री गहवरवन विहरें कबहुँ  
कबहुँ इकले कबहुँ सखियन सांकरि खोरी ते ॥

राधा श्याम सगाई जब ते  
कमल धिरयो जैसे भँवरा ते  
सखी रूप धरयो जमाई ते  
दूनर ओढ़ भानु मन्दिर में रहै छिछोरी ते ॥

### कालीदह

वृन्दावल कालीदह पै मोहन, गेद कौ खेल मचावै सी।

जहां कालीनाग रह्यो भारी  
सौ-सौ फन कौ वो विषधारी  
जाके विष ते उड़ते पंछी जर भुंज नीचे गिर जावैं सी।

खेलत में मोहन गेद लई  
औ जमुना जल में फूँक दर्ई

उठ श्रीदामा रिस खाय कृष्ण ते वही गेद मंगवावै सी।

फैंट बाँध चढ़ गये कदम पै  
कूद परे दह में ऊँचे ते

भारी भयो धमाकौ विषकौ जल तट चढ़ उफनावै सी।

देख्यो नाग श्याम सुन्दर कौ  
रूप लजावै जो चन्दा कौ

हँस हँस निरभय खेल रह्यो औ मधुर मधुर मुस्कावै सी।

फन बढ़ाय काली फूँकारै  
आँखन ते बरसै अंगारे

जीभ निकार दौर मोहन कौ अंग लपेटा खावै सी।



ब्रजवासी      हूँदत      हवां      आए  
 देख-देख      रोये      पछताए  
 नंद यशोदा दह में कूदत-ते दाऊ बगदावै सी।  
 दुखी देख सब को मनमोहन  
 अंग बढ़ाय कै तोरयो बन्धन  
 कूद चढ़े ऊँचे फन पै तब ब्रजगोपी सुख पावैं सी।  
 नाचन      लगै      कृष्ण      मतवारे  
 एक-एक      सब      फन      बैठारे  
 बाजे बहुत बजाय देवता फूलन कौ बरसावैं सी।  
 शरण-शरण कह नागिन धाई  
 तुम रक्षक है कृष्ण गुसाई  
 चरण चिन्ह दै दया कसी हरि भय ते मुक्त करावैं सी।  
 भेज्यो नाग द्वीप रमणक को  
 नाथ्यो काली जल निरमल को  
 आनन्द ब्रज में भये सबह जमुना में गोत लगावैं सी।।

-----O-----

काली दह ते निकस के आयो री नंदलाला कुंवर कन्हैया  
 काली के फन पै ठाड़े हरि  
 सौ फन पै मणियां चमकैं झरि  
 मणियन पै नाच दिखायो री नंदलाल..।  
 नागिन की पूजा लै नटवर  
 मणियन की माला पहारै उर  
 नयो पीताम्बर धार्यो री नंदलाल..।  
 कमलन की माला लटकै है  
 जैसेई तट पै पांव धरै है  
 यशुदा कंठ लगायो री नंदलाल..।  
 मैया के स्तन दूध चुचावै  
 सबके नैना भरि-भरि आवैं  
 जै-जैकार करायो री नंदलाल..।  
 आज्ञा लैकें नाग सिधार्यो  
 यमुना जल निर्मल कर जार्यो  
 ब्रज में मंगल गायो री नंदलाल..।।

-----O-----



## श्री गहवर-कुंज लीला

दियाय दै प्यारी मुख अपनो राधे वृषभानु-दुलार  
 दियाय दै बैला मतवारे रसिया पिय बन्द-कुमार॥  
 गोरो मुख चन्दा सों जा पै सटकारी लट झूमती  
 सुधापान हितकारी नागिन मुख चन्दा को चूमती  
 सटका दै प्यारी लट लटकी राधे वृषभानु-दुलार  
 नील कमल सौ सुन्दर मुख पिय जापै लटुरी झूमती  
 भ्रमर भांति रस पान करन कौ उड़ कमलन दल टूटती  
 उठा दै लटकी लटुरी रसिया पिय नन्द-कुमार  
 शुक सी सुन्दर नासिका नथ है सुनहरी सोहनी  
 उड़ नहि जावैं कीर कहूँ वह फन्दा सी मनमोहनी  
 हटा दै प्यारी पट घूँघटा राधे वृषभानु-दुलार  
 मधुरस भरे होठ दोनों हैं बिम्बाफल से लाल  
 वंशी की वंशी में पोये रसफल गोरे गाल  
 सुना दै प्यारे धुन मुरली रसिया पिय नन्द-कुमार॥

-----O-----

राधा-माधव खेलैं गहवरवन में दिव्य प्रेम के खेल॥

नित्य विहार भूमि गहवर वन  
 चिन्मय धाम नित्य वृन्दावन  
 लता बेलि द्रुम कुंज निकुंजन  
 सोरह बरसी श्यामा सोरह बरसो नागर छैल।  
 झलकै दिव्य देह दरपन से  
 नील देह में श्यामा दरसे  
 गौर देह में मोहन दरसे  
 अपनी-अपनी झाँकी देख करैं अचरज की केल।  
 प्रिया रूप में श्याम देखकर  
 कहैं श्याम यह कौन श्याम नर  
 श्याम देह में प्रिया देखकर  
 श्यामा कहैं श्याम सों आई कौन नारि अलबेल।  
 दिव्य देह की अद्भुत लीला  
 सहचरी देखें तत्सुख लीला  
 रस पीवैं नहि गुठली छीला  
 रसिकन संग मिलै दुर्लभ रस प्रिया कृपा की गैल॥



राधा सोने हू ते गोरी, सोने देख लजायो है॥

झमकै रूप अधिक सोने ते  
झलकै चमक अधिक दरपन ते  
है है श्याम दिखै हियरे ते

अपने रूप देख कै मोहित श्याम लुभायो है।

मोहन कहै सुनहु मृगनयनी  
ये है युवक कौन पिक बैनी  
सखी बनाय मोहि सुख दैनी  
हम है सखी श्याम है साजन मेल सुहायो है।

सुन मुसकावै गोरी बाला  
अति मोहित जाने नन्दलाला  
पहिराई लैकर मणिमाला  
बिम्बन में हू माला देखत भरम भगायो है।

विहरै चिन्मय देह सदा ही  
पाँच भूत मल मैथुन नाही  
शुद्ध प्रेम मय रूप कहाही  
लीला शक्ति युगल की नाना खेल दिखायो है॥

नैना ही में नैना देखै नैना रूप दिवाने हैं।

अँखियन में अँखियन को डारे  
झूम रहे गलबैयन प्यारे  
प्रेम वारुणी के मतवारे

इक टक भये पलक ना डारैं ये मनमाने हैं।

राधा माधव परम सनेही  
एक प्राण यद्यपि है देही  
प्रेम तत्व है रूप धरे ही

नित्य विहार करै गहवर वन रसिकन जाने हैं।

विहरै सदा अनादि काल ते  
अब हू विहरै रसिकन मत ते  
लीला भिटे न महाप्रलय ते  
रूप नयो नित इक दूजे को नहि पहचाने हैं।

नैना मार करै बानन ते  
नैना ही झेलै घातन ते  
काजर धार चढ़े सानन ते  
चारों नैन लड़ें जोधा से रूप रिझाने हैं।



यद्यपि श्याम हरिप्रिया गौर तन  
काया अलग भिन्न सब अंगन  
किन्तु एक से चारों नैनन  
श्याम खेत और कारे नैना हिये समाने हैं॥

-----O-----

अपने-अपने रूप देयें इक-दूजे की अखियल माहि॥

एक किशोरी राधा गोरी  
चौंसठ कला चतुर पै भोरी  
दूजै पिय चतुर सांवरो सी  
गौर रूप में भूल चतुरता अति भोरे हवै जाहि॥

पूछै श्याम प्रिया सों भोरे  
कौन बसैं अखियन में चोरे  
अखियन में धर कर बरजोरे  
प्रिया कहैं पहले तुम प्यारे हमकुँ देहु बताहि॥

श्याम नैन में कौन बसी हैं  
चन्द्रमुखी कलिका विकसी है  
ओठन पै कछु मन्द हंसी है  
नैन बसेरो करि रस घातें तुम कुँ कहा सिखाहि॥

कहैं श्याम तुम बसो नैन में  
तन में मन में औ प्रानन में  
प्यारी मेरे रोम-रोम में  
पहले तुम पीछे हम तब ही राधेश्याम कहाहि॥

प्रिया कहैं तुम नैनन तारे  
मेरे नैनन के उजियारे  
तन मन प्रान तुमहि पर वारे  
राखूँ श्याम केश माथे पै बेनी तुमहि गुहाहि॥

-----O-----

### दाऊजी

यमुना लहर-लहर लहटावै दाऊ तट पै रास रचाय॥

रथ चढ़ दाऊ आये ब्रज को  
कियो प्रणाम नंद यशुमति को  
हंस भेंटे सब गोप सखन को  
सखा कहें दाऊ ब्याहे ते ब्रज को दियो भुलाय॥

गोपी बोली निठुर कन्हैया  
चतुर बड़ी है वह छलबलिया  
प्रीति डोर तोरयो निरमोहिया



हरि संदेश कह्यो दाऊ ने धीरज दियो बंधाय।

यमुना तट उजियारी छाई  
वरुण पुत्रिका वारुणी आई  
महक उठ्यो सब वन रसदाई  
जल क्रीड़ा को दाऊ टैं यमुना आवै नांय।

हल ते खेंची यमुना आई  
करी क्षमा छोड़ी यदुराई  
ऋतु बसंत विहरे सुखदाई  
लक्ष्मी ने नीलाम्बर दीयो गहने हार धराय।।

-----O-----

ब्रज के राजा इन को कहियत,  
दीनदयाल बड़े बलराम।।

गोरो अंग चमक बिजली सी  
नीलो बसन मेघमाला सी  
माला बड़ी इन्द्र धनुषी सी  
जामा कटुला कंकण हाथन लकुट सुनहली धाम।  
राम कृष्ण गोपालक ब्रज में  
खेलें खेल अनेक सखन में  
यमुना तट और कुंज वनन में

नौबत बाजै बजै नगाड़ी सदा ही धूमस धाम।

राम कृष्ण ये दोनो भैया  
संग संग नाचैं ता ता धैया  
गवाल बाल ढफ ढोल बजैया  
बंशी सींगी तुरही बाजै रस बरसै अविराम।

माखन मिश्री भोग लगावै  
कमलन की माला पहरावै  
लाल नेत्र वारुणी छकावै ।  
रसिया बड़ो रसीलो छैला अलबेलो है गाम।।

-----O-----

ता ता थैइया ता ता थैइया नाचैं राम गुपाल।।

दाऊ गावै मोहन नाचै मोहन गावै दाऊ नाचै  
तुमका दै दै नाचै देवै हाथन ते करताल।  
दोऊ गावैं गवाला नाचैं, गवाला गावैं दोऊ नाचैं  
नाचैं गावैं हंसैं हंसावैं रंग रंगीले गवाल।  
होड़ा होड़ी भयी लड़ाई, सब में है गार्इ हाथापायी  
दाऊ ते तब न्याय कराई, नाचैं गावैं सबै भुलाई  
ऐसे खेलैं खेल सबै मिल बछरन के प्रतिपाल।।



## यमुना तट

अब घर कैसे जाऊं मेरी माय, चुन्डरिया भीज गई॥

सखी सी पनिर्वाँ को निकसी

पहुँच यमुना पै गई, अब घर कैसे..।

सखी सी न्हाय भरी गगरी

गगरिया सीस लई, अब घर कैसे..।

सखी सी पतरी कमर लचकै

गगरिया भारी भई, अब घर कैसे..।

सखी सी औचक आये श्याम

लकुटिया तान लई, अब घर कैसे..।

सखी सी बरज रही कर जोर

गगरिया फोर दर्ई, अब घर कैसे..।

सखी सी भीज गई सबरी

जुलम की बात नई, अब घर कैसे..।

सखी सी पूछैगी घर की

कहाँ अंगिया भिजई, अब घर कैसे..।।

-----O-----

यमुना लहर-लहर लहरावै कान्हा दीजो पार लगाय।

जब यमुना टखने लों आई

मेरी बांह पकर गिरिधारी, मेरी पायल भीजी जाय।

जब यमुना घुटुमन लों आई

मेरी बांह पकर गिरिधारी, मेरी साड़ी भीजी जाय।

जब यमुना जांघन लों आई

मेरी बांह पकर गिरिधारी, मेरी लंहगा भीजी जाय।

जब यमुना कमरन लों आई

मेरी बांह पकर गिरिधारी, मेरी तगड़ी भीजी जाय।

जब यमुना छतियन लों आई

मेरी बांह पकर गिरिधारी, मेरी चोली भीजी जाय।

जब यमुना गरवा लों आई

मेरी बांह पकर गिरिधारी, मेरी चूनर भीजी जाय।

जब न जाऊं कुंवर कन्हैया

मेरी बांह पकर गिरिधारी, मोय लीजो अधर उठाय।

-----O-----



अरे ह्यां गहरो पाणी नंद के,  
मेरी लीजो बांह पकर के ॥

अरे नंद के मोय पकरियो नहिं तो मैं बह जाऊंगी,  
भारी गहजन बोझ भरी मैं तेरी हा-हा खाऊंगी,  
जल्दी ऐयो बह रही यमुना धार सरर सर करके,  
नीली यमुना नीलो पानी नीलोई तेरो रंग है,  
बहती धारा रुक जावै जब बंशी मधुर बजावै है,  
एक बार फिर फूंक लगेयो बंशी होठन धरके,  
अचक पकरियो मेरी कलैया बहुतइ नरमनरम सी है,  
वादिन तनक मरोरी तैंनें अब ताई वो दूखे है,  
दे गलबैया अचकै तै गये ऊपर हाथ पकर के ॥

-----O-----

बरसाजो रसमय बरसाजो ॥

राधा प्रेममयी तहां खेलत, कन कन रस कौथानो  
रस ही खानो रस ही पानो, रस ही रस सरसानो  
बहुत दिना ते रहि बरसानो, अजहुं रस नहिं जानो  
अब भव में कहां जाऊं रसिकनी, यह तव नाम हंसानो  
वास दियो अब देहु रास रस, निर्मल करि मनमानो ॥

धाम

बरसाजो

जै जै बरसाजो गाँव जहं राधा रानी राज रही ॥

पर्वत ऊपर महल मणिन कौ  
जाके आगे त्रिभुवन फीकौ  
ब्रह्मा रूप धरें पर्वत कौ  
श्री चरनन को है धाम जहं राधा रानी..।

इत में मन्दिर दान बिहारी  
ह्यां पै दान दियो प्रिय प्यारी  
देत परस्पर कौतुक भारी  
ह्यां रस देवे कौ काम जहं राधा रानी..।

गढ़ विलास की चौटी समतल  
ऐसी प्रीति बढ़ी ह्यां निश्चल  
राधा माधव खेलैं सब थल  
अति सुन्दर छटा ललाम जहं राधा रानी..।

मोर कुटी की शिखर निराली  
जहं बैठी वृषभानु की लाली  
नाचैं श्याम बजावैं ताली



धर मोर रूप अभिराम जहं राधा रानी...

उत में मन्दिर मान बिहारी  
मान कियो जंह राधा प्यारी  
पकरे चरन जाय गिरधारी

मत रुसौ मानिनि भाम जंह राधा रानी...

ब्रह्माचल पर्वत मन भायो  
सब शिखरन की लीला गायो  
लीला नित्य यहाँ दरसायो

जे गाँवें राधा नाम जहं राधा रानी...

-----O-----

राधा रानी को है बरसावों, रंगिलो बरसावों॥

राधा महारानी जंह राजें  
श्याम करै अगवानों, रंगिलो बरसानों।

पीरी पोखर प्रेम सरोवर  
भानोखर को न्हानो, रंगिलो बरसानों।

जहाँ भानुगढ़ भानु भवन है  
मन्दिर है जगजानों, रंगिलो बरसानों।

ओढ़ चूनरी प्यारो आवै  
सखी वेष को बानों, रंगिलो बरसानों।

जंह होरी की गली रंगिली  
लठमार मनमानो, रंगिलो बरसानों।

जहाँ खोर सांकरी रसीली  
होय जहाँ दधि दानों, रंगिलो बरसानों।

जहाँ विलास दान गढ़ सोहै  
रसलीला रसखानों, रंगिलो बरसानों।

जहाँ रंगिलो गहवर वन है  
नित्य रास कौ थानों, रंगिलो बरसानों।

जहाँ निराली मोरकुटी है  
मोर नाच नचवानों, रंगिलो बरसानों।

जहाँ मानगढ़ प्यारी रूटै  
होवै मान मनानों, रंगिलो बरसानों॥

-----O-----



सबसों सुन्दर है बरसावों ब्रज में राधा राबी कौ॥

जहाँ बिराजें राधा रानी  
जाकी श्याम करें अगवानी  
महिमा वेदन हू नाय जानी  
पर्वत ऊपर मन्दिर चमकै सब जग जानी कौ॥

खोर सांकरी बड़ी रसीली  
दधि लै चलीं कुंवरी गरबीली  
साखियाँ संग में बहुत हठीली  
आगे मोहन गैल रोक दियो रूप लुभानी कौ॥

दैजा दान कुंवरी रसिया कौ  
पीत पिछोरी कटि कसिया कौ  
कुँवरि हँसी लखि मन बसिया कौ  
झूँघट में ते छीन लियो मन वा मनमानी कौ॥

गहवर वन की लता-पतन में  
बिहरें राधा मोहन वन में  
फूले-फूले तन में मन में  
बड़े-बड़े सुर नर मुनि तरसैं या रजधानी कौ॥

श्री बरसावों रस बरसावों रावें राधा अलबेली॥

जानें बस में कियो विहारी  
जैसे फूल कमल भँवरा सी  
रस की पैनी मार दुधारी  
ऐसी प्रीति बड़ी ज्यों नदिया सावन में रेली॥

दयामयी दीनों की श्यामा  
मोहन गावें राधा नामा  
पूर्ण ब्रह्म की पूरण कामा  
रंग रंगीले खेल रस भरे मोहन संगे खेली॥

जाकी लीला कहत न आवै  
गुप्त जान शुकदेव न गावै  
कृपा बिना कोइ समझ न पावै  
प्रेम खिलौना राधा माधव करें प्रेम केली॥

गहवर वन की भूमि रसमयी  
लता पता सब साज रसमयी  
सखी सहचरी बनी रसमयी  
गहवर कुंजन फूल बिछौना छाई रसबेली॥



ब्रज तो है प्रेम बजार रे, सौदागर श्याम घरब डोले॥

पर्वत ऊपर भानु महल है

ऊँची जाकी किवार रे, सौदागर श्याम..।

महलन राज रही महारानी

भोरी भानु दुलार रे, सौदागर श्याम..।

राधा नाम धाम बरसानो

अलबेली सरकार रे, सौदागर श्याम..।

ठाड़े बाट तकें मनमोहन

कब खूटैगो द्वार रे, सौदागर श्याम..।

सखी दलाल ऐँठ ते बोलैं

कर रहे हरि मनुहार रे, सौदागर श्याम..।

मोर मुकुट कुं चरण छुवावै

ऐसे हैं रिझवार रे, सौदागर श्याम..।

द्वार खुलेपै भीतर जावै

जहाँ दियो अपनपौ वार रे, सौदागर श्याम..।

ऐसी प्रेम मयी ब्रजभूमी

ऐसो रस व्योहार रे, सौदागर श्याम..।।

झुक ही गयो सिर देखी जो शिखर,

बरसाने पर्वतवारी की॥

येई वो पर्वत ब्रह्माचल

जंह राधे खेली हैं सब थल

आँख लगी उधर, देखी जो शिखर..।

ये वही भानुगढ़ की चोटी

रहै राधे भागन की मोटी

चलो महलन पर, देखी जो शिखर..।

जैकारे हों वृषभानु भवन

जै राधे गावैं भक्त सुजन

जै भानु कुँवर, देखी जो शिखर..।

रसभरी सांकरी की गलियां

दधिदान दियो ब्रज की सखियां

लियो नंद कुँवर, देखी जो शिखर..।

ये वही रसीलो गहवरवन

जहां रास विलास करैं दोऊ जन

रस बरसै झर, देखी जो शिखर..।।



## गहवर वन

गहवरवन की कुञ्ज गलिन में, खेले राधा कुँवर कन्हैया॥

धिर रही घटा जु कारी कारी  
नाचने लगे श्याम बनवारी  
मोर नाच नाचें गिरिधारी  
मोर कुटी की शिखर बन गई, पवन चले पुरवैया।  
ऊपर मान कियो है प्यारी  
चरनन कुँ पकरैं गिरिधारी  
मान मनावन कौ रस भारी  
मन्दिर मान बन्यो पर्वत पै झांकी है सुखदैया।  
हरी लता फूलीं फुलवारी  
झूम झूम रही डारी डारी  
खिल रही रैन चन्द्र उजियारी  
प्यारी प्यारे नाचें हैंस हैंस रीझि देत गलबैया।  
दक्षिण कुण्ड दोहनी दमकै  
उत्तर श्रीजी मन्दिर चमकै  
पूरव मोर बिहारी झमकै  
पच्छिम मान बिहारी मान मिलन रस सिन्धु बहैया।

## मोर कुटी

पर्वत पै कोहक भयो भारी, गहवर वन बोले मोर॥

उठे उनींदे गहवर कुञ्जन  
वन विहरैं दोड भोर, पर्वत पै कोहक..।  
मोर मोर कुटी बैठे प्यारी संग  
मोहन चित के चोर, पर्वत पै कोहक..।  
हरियाली पै झुकी बदरिया  
पुरवैया झकझोर, पर्वत पै कोहक..।  
प्यारे-प्यारी कौ पटुका और  
उड़े चुनरिया छोर, पर्वत पै कोहक..।  
उड़-उड़ आय गये सब मोरा  
देखन युगल किशोर, पर्वत पै कोहक..।  
श्यामा मोर मंडली सब  
नचवैं नैनन की कोर, पर्वत पै कोहक..।  
पंखन खोलैं ताली पै सब  
नाचैं मण्डल जोर, पर्वत पै कोहक..।  
श्यामा की पैजनियाँ बाजे  
मुरली हरि की घोर, पर्वत पै कोहक..॥



## नन्दगौँव

ऊँचे नंदीश्वर पर्वत पै सोहै मोहन को नन्दगौँव ॥

शिव नें रूप धरयो पर्वत को  
लें हरि पद रज की आशा को  
कृषा दरस हित आये ब्रज को  
नंदभवन दोटी पै चमकै मणिमय सुन्दर धाम।

जसुदा लाला नाहि दिखाये  
शिव ने रोवत श्याम हँसाये  
गंडा हरि के हाथ बंधाये  
मैया वास दियो शिव महलन उत्तर द्वार विराम।

ऊँचे चारों द्वार महल के  
चार छतरी हैं द्वारन पै  
ऊपर ते दरसन सब ब्रज के  
दक्षिण बरसानौ दमकै जहं राधा दुलहिन भाम।

हरि दाऊ राजें मन्दिर में  
नन्द जसोदा दोउन संग में  
श्रीराधा दुलहिन की छवि में  
चारों ओर बसे मन्दिर के सखा खिलावैं श्याम ॥

मोहन वृन्दावन के राजा राधा महाराजी सुकुमार ॥

बीस कोस वृन्दावन गायो  
बरसानों गहवर तक छापो  
गोवर्द्धन हू वन में आयो  
तैर-तैर पै रस की लीला करी जुगल सरकार।

योजन पाँच बन्यो वृन्दावन  
मुख्य भूमि तट यमुना कंकन  
रस विहार होय जंह कुंजन  
विधि हरि हर दुर्लभ रजधानी नित बरसै रसधार।

सृष्टि चक्र में यह बन नाही  
माया की गति नहि अवगाहीं  
काल शक्ति वन में नहि जाहीं  
महाप्रलय ब्रज-धूरि न नासै जगमग ज्योति अपार।

भूमि चिन्मयी है अविनासी  
हेममयी मणिमयी प्रकासी  
दिव्य लता हुमबेलि विलासी  
परब्रह्म हू धाम ज्योति है सब ऋतु सदा संवार।



ब्रह्मा देख्यो वैभव वन कौ  
रमा चतुर्भुजमय कन कन कौ  
अगनित विधि सेवत-रज कन कौ  
है चौमुहा भयो जड़ सौं गिरि वृन्दा भूमि मंझार ॥

-----O-----

गोकुल में सोर भयो भारी, वृन्दावन बोलें मोर ॥

उड़-उड़ मोर कदम पै चढ़ गये  
बैठे पंख मरोर, गोकुल में सोर...  
टप-टप पेंच गिरैं जमुना में  
बीनैं नन्द किशोर, गोकुल में सोर...  
उन पेंचन को मुकुट बनायो  
पहिरैं श्याम किशोर, गोकुल में सोर...  
धन्य-धन्य ये ब्रज के मोरा  
जाय रीझें माखन चोर, गोकुल में सोर...  
नाचैं देख देख धनश्यामहि  
कुहकैं सुन्दर घोर, गोकुल में सोर... ॥

-----O-----

भारी बृन्दावाँव बड़ी है प्यारी, जहं खेले वंशी चारो ॥  
ऊँची शिखर नन्दबाबा की ऊँची भवन विराजत है,  
चारों ओर गोप गोपिन सों बरस्यो गाँव छवि पावत है,  
नंदीश्वर पर्वत बन शिव ने हरि चरनन उर धारो।  
नन्द बाबा जसुदा मैया बलदाऊ लाड़ लड़ावत हैं,  
सुबल सुबाहु तोष मधु मंगल टोल सखन कौ राजत हैं,  
नौ लख गाय बंधी खूंटो पै गाय चरावनहारो।  
पावन सर यशुदा कुंड ललिता कृष्ण कुण्ड मधुसूदन हैं,  
छप्पन कुण्ड आयमन ऊर्ध्व क्यारी और आरेश्वर हैं,  
देर कदम चढ़ गाय बुलावै या ब्रज कौ रखवारो।  
नन्द्याँव बरसानों सजन-सनेही मीठो नातो है,  
लाल लाड़िली प्रीति ब्याह कौ आनन्द रसिक सुहातो है,  
कृपा करें जब हिय में आवें यह ब्रज रस उजियारो ॥

-----O-----



## वात्सल्य माधुरी

माखन खाद्य लै दूध अघाय,  
गोपिन के घर मत जैयो ।।

यों कहै यशोदा मैया  
सुन लै तू लाल कन्हैया  
में तेरी लकं बलाय, गोपिन के घर...

लौनी की भरी मथनियां  
तेरे आगे धरी कन्हैया  
मिश्री मन कर लेय मिलाय, गोपिन के घर...

तेरे बाबा नंद बिरज में  
है नाम बड़े गोपन में

कारो नाम न तू करवाय, गोपिन के घर...  
सुन बोल उठयो नंदलाला  
ये झूठी हैं ब्रजबाला

इनने गजब ही दीयो ढाय, गोपिन के घर...

यो मोकूं टेर बुलावैं  
ओ हाथ पकर ले जावैं  
सोगंध तेरी दैय खवाय तू इनपै मत पतिथैयो ।।

मेरो कबुआ आँखिन तारो है,  
कोई गारी भूल न दीजो ।।

लहरो सो मेरो भोरो-भारो  
मेरो प्राण अधारो सी, कोई गारी... ।

जाको जितनों दूध दुरायो  
मोते चुकौ उधारौ सी, कोई गारी... ।  
दुगनों तिगुनों लेहु सौगुनों  
दूध दही कौ गारौ सी, कोई गारी... ।

अपनों सो बालक तुम जानों  
छोटुन चोहकायो मेरो सी, कोई गारी... ।

तुम्हरो ही आशीष फल्यो जो  
नन्द महर कौ बारौ सी, कोई गारी... ।  
मांगू भीख पसारै आँचर  
मेरी ओर निहारो सी, कोई गारी... ।।

-----O-----

बाँध्यो मैया दशोदा अपनों लगला ।  
कोमल कर रसरी ते बाँध्यो डरपै लला ।।

रोय रोय अंसुआ ढरकावै  
हाथन नैना मीड़त जावै  
सबरे मुख कजरा फैलावै



हिलकी दै दै लेय उसासैं रूँछ्यो गला।

चम्पकली, कुंदकली आयीं देखन  
रे भई ब्रज की जुरी सखियन  
बंध श्याम ठाड़े है आंगन  
बोलीं मत बांधो तुम छाड़ो अपनो लला।

-----O-----

श्याम चराय ला गैया, तोय माखन दूंगी।।

माखन दूंगी भिसरी दूंगी  
दूंगी दूध मलैया, तोय माखन दूंगी।

दूर न जैयो पास चरैयो

असुरन को डर भैया, तोय माखन दूंगी।

जमुन न जैयो नाय नहैयो

काली तहां रहैया, तोय माखन दूंगी।

मिलके रहियो सखन ते न लड़ियो

सब रहियो इक ठैया, तोय माखन दूंगी।

दाऊ संग रहियो, अलग न जैयो

मैं तेरी बलि जैया, तोय माखन दूंगी।

जल्दी ऐयो देर न करियो

कहै जसोदा मैया, तोय माखन दूंगी।।

श्री राम

जयमाल कर लैकें चली जलक दुलार।।

राम ने तोरयो धनुष शम्भु को, सब करैं जै जैकार।  
हौले चलीं सीता चल्यो न जावै, तन काँपै सुकुमार।  
बैयाँ पकरि सखि आगे चलावें, सीता भई लाचार।  
देवी ते भ्रमंयो वर मिल्यो सोई आयो, यह समय न टार।  
राम के आगे जाय टाड़ी भई सखी, सब गावें मंगलाचार।  
गुरुतन देख राम शीघ्र झुकायो, माला दियो गर धार।  
रियावर राम चन्द्र जय कहैं सब, जाऊँ जोरी बलिहार।।

-----O-----

लालन धीरे धीरे चलिये लली की गलियाँ।।

ये तो नाहिं अवधपुर नगरी

लालन ये चिकनी मिथिला गलियाँ।

मैं गोरे जनक औ सुनयना गोरी,

लालन गोरी हमारी सिया ललियाँ।

कौसल्या है गोरी औ गोरे दसरथ,

लालन तुम कैसे भये सांवरे वरनियाँ।

गोरी कौसल्या ने गोरी खीर खाई,

लालन कहाँ ते लाई सांवरो रंगिया।।



देखो देखो आये रघुवीर बगिया में॥

सखी री फूलवा बीनन गुरु काजे, विश्वामित्र काजे  
संग-सोहे-लखन छोटे बीर बगिया में।

सखी री दशरथ के ये ढोटा, राजा के ये ढोटा  
खेलै-खेलै सरजू के तीर बगिया में।

सखी री दोनो के हाथ धनुष है, हाथ धनुष है  
बांधे कांधे पै तरकस तीर बगिया में।

सखी री श्याम वरन बड़ भैया, वरन बड़ भैया  
छोटे भैया को गोरो सरीर बगिया में।

सखी री माथे मुकुट कानों कुडल, मुकुट कानों कुडल  
इन्हें देखन को लागी भीर बगिया में।

सखी री सीता के योग लला राम, कुँवर लला राम,  
जगदंबा हरेगी भीर बगिया में॥

-----O-----

आज छोड़ के अयोध्या चलै हैं रघुराई॥

राज महल के सब सुख छोड़े  
छोड़ी सरयू नदी सुखदाई, आज छोड़...।

दशरथ पिता बिलखते छोड़े  
छोड़ी कौसल्या सी माई, आज छोड़...।

ऐसो पाठ पढ़यो दासी ते  
कैकई ने वन दिये हैं पठाई, आज छोड़...।

फूलन सों सुकुमारी सीता  
वन को लै पति संग हरषाई, आज छोड़...।

सीता राम चरण अनुरागी  
संग चले लछमन से भाई, आज छोड़...।

अब के बिछुरे कबहि मिलेंगे  
इनकी विपति कही नहि जाई, आज छोड़...॥

-----O-----



लंका जीत गये श्री राम मारयो रावण बौलछिया ॥

एक लख पूत सवा लख नाती  
ताके घर में दिया न बाती  
मंदोदरी पीट रही छाती  
दस स्त्रि बीस भुजा गोदी तै रोवै वह दुखिया।  
परनारी चोरी ते लायो  
सबने तोय बहुत समझायो  
तैनें प्रभु ते रार बढ़ायो  
हनुमान ने लंका फूँकी बन्यो दूत खुपिया।  
बांध्यो काल जीत पाटी ते  
सूरज कांपे तेरे भय ते  
तैंतीस कोटि भजे सुर रण ते  
स्यार गीध स्त्रि खावें तेरे भिनख रही मखियां।  
नांय मानी छोटे भैया की  
मारी लात सीख सुन हित की  
गयो शरण वह राम चंद्र की  
लंका राज विभीषण पायो अटल छत्र सुखिया।

## आज के चोर

हनुको कृष्ण रूप ही जानो, धन धन ब्रज भाउल के चोर  
ब्रज में साधू भजन कूँ आवैं  
गुरु कर वैराग्य जुगल कूँ ध्यावैं  
सेवैं नाम रूप गुन गावैं  
भावत् भक्ति लेश ते हूँ उनको जस फैले घोर।  
भजन प्रताप सिद्धि सब आवैं  
संग ऐश्वर्य बहुत ही लावैं  
चोला चोली फौज जुरावैं  
घुटन लगैं तब माल मलाई लड़ुआ लुड़कैं जोर।  
संग माया वश तब भजन न होवै  
संग संग्रह की आदत बढ़ जावै  
हिन्दि सुख में हरि बिसरावै  
तोंद सेठन कारन सेठ सँवरिया ते लई तोर।  
पतन देख के प्रभु तब धावैं  
चोरन को सौ रूप बनावैं  
निर्ध पाँच सात गवाला संग लावैं  
घुसैं रात में सबही माया लेवैं माल खखोर।



कबहु कबहु मार लगावैं  
 देंय दण्ड और त्याग सिखावैं  
 भूल्यो भयो फेर सम्हरावैं  
 धर ते आयौ हरि दर्शन कैं ह्यां बन गयो छिछोर।  
 रहै विरक्त संत शरनन में  
 गुरुजन के कठोर शासन में  
 होय न पतन कबहु भावन में  
 प्रतिपल बढ़ै भजन औ निश्चय पावै जुगल किशोर।

-----O-----

एक दया कौ रह्यो भरोस्यो॥  
 सब विधि भयो निराश राधिके दीन और कौ मो सो  
 तू है परम दयाल स्वाभिनी, भोरी और न तो सो  
 आस पर्यो गहवर वन चाहे छांड़ो चाहे पोसो॥

-----O-----

हैं तेरी तेरी हों रहौंजी॥  
 एक दिना या ब्रज में बसिके चरनन प्रीति लहौंगी  
 कोई कछु कहै दुर्वचनन सुनि नहि नेंक डरौंगी  
 सहि हौं सब कुछ मार धार हू पर नहिं प्रीति तजौंगी॥

## परिशिष्ट

मेरे कजुला को मजुला लगयो है कै नांय,

मोय सांची बताय॥

सुन ऊधो तू सूधी कह दे  
 वाको मथुरा भाई के नांय, मोय सांची..।

काखन खावै माखन मिसरी

हवां माखन मिसरी मिली है कै नांय, मोय..।

ह्यां तो रास रचातो कान्हा

हवां वाय गोपी मिली है कै नांय, मोय..।

ह्यां तो चरातो गैया बछरा

हवां वाय गैया मिली है कै नांय, मोय..।

ह्यां तो बजातो बांस बंसुरिया

हवां वाय बंशी मिली है कै नांय, मोय..।

ह्यां तो कान्हा मटकी फोरे

हवां वाय मटकी मिली है कै नांय, मोय..॥